



03. februar 2009

Inatsisartut Suleriaasianni § 36, imm. 1 naapertorlugu Naalakkersuisunut apeqqut imaattoq matumuuna saqqummiuppara:

1. **Timimikkut innarluutillit siunissami qassit innarluutiminnut ikiorsiisutissanik pisariaqartitsisillutik, aatsaat Fond-nut (aningaasaateqarfinit) qinnuteqarnikkut ikiorserneqartalissappat?**
2. **Naalakkersusiut qanoq pilersaaruteqarpat tusilartut naapeqatigiin-nissaannik aaqqissuussinissamik?**

(Inatsisartunut ilaasortaq Agathe Fontain, Inuit Ataqatigiit)

Tungavilersuut:

Januarip 14.-ani akissuteqaammi tusilartunut nutaanut cochlear implant-mik ikkussussivigineqartarneri Naalakkersuisut isumalluutigigaat erseqqissarpat. Taamaammat ussersorluni oqalunneq ilinniartitsissutigisallugu pilersaaruteqartoqanngilaq.

Tassani pivatit tusilartuullutik inunngortartut nutaat! Uanga apeqquteqaatinni pivakka, meeraaraallutik cochlear implant-ternikuunngitsut, ussersorlutillu oqaasillit, akissuteqaammi 23-it missaannut kisitisitalikkatit.

Akissuteqaammi ilanngussami suliniummi atuarneqarsinnaavoq, taakkuussut 23-it akornanni kiserliortutik inuusut, tamannalu kinguneqartartoq, qasusoornermik aliasuuteqalerneramik, imminullu toqunnissamik siorasaarineramik nalaataqartunik.

Tungavilersuutit imaannaangeqaat, tusilartumut kiserliortumut minnerunngitsumik angajoqqaanut ussersornermik tamakkiissuunngitsumik oqaloqateqartussanut.

Taamaattorli suliniutit Internet atorlugu tusilartut attaveqatigiittarnissaat fond-nut qinnutigineqarpoq, - itigarlusilu.

Naalakkersusiut apererusuppakka, innarluutillit siunissami qassit innarluutiminnut ikiorsiissutissanik pisariaqartitsisut aatsat Fond-nut qinnuteqarnikkut ikiorserneqartassappat?

Siusinnerusukkut tusilartut ussersorlutik oqaasillit, angajoqqaallu, tapersersortillu naapisinneqartarneri, tusilartunut annertuumik iluaqutaasarpog. Aaqqissuineq pitsaasuutillugu annertuumik sunniuteqartarmat.

Tamannalu paasinarpoq tusilartunit maqaasineqartoq. Pineqartullu 23-it akornanni aamma angajoqqaat naapillutik ussersornermik pikkorissartarnerat amigaatigineqarpoq. Imaangilarmi inerismasunngorsimmamata ussersorneq unitsinneqassasoq, sulimi inooqataapput, ukiorpassuarnilu inooqataassallutik.

Siusinnerusukkut tusilartut ussersorlutik oqaasillit ukiut tamaasa naapitinneqartarput, pikkorissarnerit isumasioqatigiinnerit il.il naapeqatigiinnermi aaqissuunneqartarlutik.